

արել են: Յակամայ կամս դառնալով դէպ 'ի Տէր-  
Հօր, — « Լաւ չէ՞ր լինել, գրուցեցի որ այս խաչ-  
« կալը ոչ այդչափ բարձր լինէր, և փոխանակ այդոր՝  
« սակաւ մի գիւղին ուսումնարանը ընդարձակ լի-  
« նէր, որով ուսանողք ոչ ապականեալ օդով չըն-  
« չէին »: Տէրտէրը համաձայն էր կարծեացս. այլ  
եղածը եղած էր: Նուիրած է եկեղեցիս յանուն Ս.  
Սարգսի զօրավարին. բաց յայնմանէ՛ ջերմեռանդն  
ուխտաւորք Ս. Պարասքեեայ ևս մեծ յարգութիւն  
կ'ընծայեն այս տաճարիս մէջ, 'ի յիշատակ Ս. Ուր-  
բաթ Ղրիմեցի եկեղեցւոյն, որ ցարդ կանգուն կե-  
ցած է թոփլու կոչուած գիւղին՝ մի սարի վերայ:

Երկրորդ օրը Համբարձման տօնն էր, արևը  
դէպ 'ի մուտս կը խոնարհէր, հարկ էր մեզ փու-  
թալ 'ի Նախիջևան. թէպէտ և մնաց մի այլ գիւղ  
որոյ կարող չեղայ յայց ելնելու, այն է Փոքր կամ  
Սուլթան Սալա կոչուածը, այլ մեծերէն կարելի  
էր գուշակել և փոքրին ինչ լինելը: Լսեցի որ այն  
գիւղին նորաչէն եկեղեցին նուիրեալ է յանուն Ս.  
Քէօրզայ զօրավարի, և ունի ուսումնարան մի 32  
աշակերտով:

Ներկայ տարւոյս (1886) մի նոր գիւղ ևս ձեւ-  
ցուցել են Նախիջևանցիք քաղաքէն 12 վերստ հե-  
ռաւորութեամբ դէպ 'ի թայղան գնացող ճանա-  
պարհին վրայ, որոյ Եկատերինովքա ուսաւհնչիւն  
անուն տուած են: Անշուշտ այդ նորաչէն և 'ի  
չարս Նախիջևանցի հայաբնակ գիւղերուն վեցե-  
րորդն՝ քան զհիները առաւել բարեձև կը լինի, այլ  
դեռ շունի ոչ եկեղեցի և ոչ ուսումնարան:

Թոփթիի անապատացեալ և անբոյս երևոյթն՝  
տխուր հետք մի թողուց իմ երևակայութեանս  
վրայ. 'ի դարձիս ֆայետոնին մէջ լռիկ նստած